

## Sampah di parit, sungai sekat aliran air, punca banjir kilat di Cameron Highlands

Oleh **Mohd Rafi Mamat** - Februari 6, 2024 @ 1:26pm  
[bhnews@bh.com.my](mailto:bhnews@bh.com.my)



Gambar hiasan

CAMERON HIGHLANDS: Perbuatan membuang pelbagai jenis sampah ke dalam parit dan sungai menjadi punca utama kejadian banjir kilat dan tanah runtuh yang berlaku di daerah ini, kata Ahli Parlimen Cameron Highlands, Datuk Ramli Mohd Noor.

Beliau berkata, terdapat segelintir masyarakat tidak bertanggungjawab membuang sampah hingga menyebabkan parit tersumbat dan melimpah setiap kali musim tengkujuh berlaku setiap tahun.

Katanya, hanya kesedaran daripada masyarakat saja dapat membendung kejadian banjir kilat dan tanah runtuh yang hampir setiap tahun di daerah ini dengan kejadian

terbaru berlaku pada 26 Januari lalu yang menyebabkan lima pekerja kebun sayur maut tertimbus tanah runtuh di Kampung Raja, Blue Valley, di sini.

"Setiap kali hujan lebat berterusan dalam masa beberapa jam saja, banjir kilat akan berlaku dan yang menjadi mangsa ialah penduduk yang tinggal di kawasan berhampiran parit.

"Ini kerana air tidak dapat mengalir sempurna akibat banyak sampah yang akhirnya melimpah hingga berlaku banjir. Bagi memastikan kejadian itu tidak terus berlaku, masyarakat perlu sedar tanggungjawab menjaga kebersihan, selain penguat kuasa perlu dilakukan secara berterusan bagi membendung kegiatan itu," katanya pada Majlis Penyerahan Kunci Kwarters Tenaga Nasional Berhad (TNB) Sungai Ruil kepada Jabatan Kemajuan Orang Asli (JAKOA), di sini.

Hadir sama, Pengurus Besar TNB Pahang, Datuk Baderul Sham Saad; Ketua Pengarah JAKOA, Datuk Sapiah Mohd Nor dan Pengarah JAKOA Pahang, Johari Alwi.

Seramai 17 keluarga membabitkan 88 isi rumah yang terbabit dengan kejadian tanah runtuh pada Februari tahun lalu, ditempatkan sementara di kuarters TNB selama dua tahun.

Mereka hanya dibenarkan pulang ke rumah masing-masing selepas kerja pembaikan cerun itu siap yang dijangka mengambil masa dua tahun, membabitkan peruntukan RM3.5 juta.

Sementara itu, Ramli berkata, pihaknya berharap kerja pengukuhan dan penstabilan penghalang hakisan dapat dipendekkan kepada setahun setengah, bagi memberi peluang 17 mangsa dapat kembali segera ke rumah masing-masing.

Katanya, sebelum berpindah ke kuarters TNB, mangsa terpaksa berlindung di pusat pemindahan sementara (PPS) Sungai Ruil lebih tiga bulan.

"Saya mengingatkan kepada kontraktor yang diberi tanggungjawab menjalankan projek penghadang hakisan di Sungai Ruil ini supaya tidak membuat hal hingga menyebabkan ia tertangguh lagi.

"Saya lihat sebelum ini banyak projek kemudahan untuk rakyat tertangguh selain bertukar beberapa kontraktor, yang menyebabkan imej kerajaan tercalar disebabkan kejadian berkenaan. Saya berharap pihak Jabatan Kerja Raya (JKR) sentiasa memantau perjalanan projek berkenaan," katanya.

Baderul Sham pula berkata, TNB bersetuju menawarkan sewa RM500 sebulan seunit dan mengecualikan bayaran deposit sewaan selama tiga bulan seperti terkandung dalam syarat perjanjian penyewaan sebelum ini.

"Saya berharap kuarters empat tingkat dengan kemudahan surau memberi keselesaan kepada 17 keluarga membabitkan 88 isi rumah Orang Asli ini," katanya.